

## Tindakan penguatkuasaan pertanian atas tanah rizab jalan di Cameron Highlands ditangguh

Khairulmizan Yahya, Am@Hmetro.Com.My



HO Chi Yang (kiri) ketika pertemuan dengan Menteri Besar Pahang, Datuk Seri Wan Rosdy Wan Ismail (dua kanan) di Cameron Highlands.

Kuantan: Petani yang mengusahakan pertanian atas tanah rizab jalan di Cameron Highlands dapat menarik nafas lega apabila kerajaan negeri bersetuju untuk menangguhkan tindakan penguatkuasaan.

Ahli Dewan Undangan Negeri (Adun) Tanah Rata Ho Chi Yang berkata, perkara itu disampaikan Menteri Besar Pahang Datuk Seri Wan Rosdy Wan Ismail susulan pertemuan mereka baru-baru ini.

"Saya sudah membawa isu ini kepada Menteri Besar ketika membuat lawatan di Cameron Highlands bersama Yang DiPertuan Agong (Al-Sultan Abdullah Ri'ayatuddin Al-Mustafa Billah Shah) baru-baru ini.

"Wan Rosdy sudah berjanji akan mengurangkan kawasan yang terbabit dengan tindakan penguatkuasaan tetapi kebun yang terletak atas rizab sungai perlu dikosongkan berikutkan persediaan projek menaik taraf sungai pada masa akan datang.

"Tindakan penguatkuasaan terhadap kebun atas tanah rizab jalan akan ditangguh," katanya dalam satu kenyataan, di sini, hari ini.

Chi Yang berkata, pihaknya sebelum ini menggesa kerajaan negeri mempertimbangkan nasib petani Cameron Highlands dan tidak melakukan tindakan penguatkuasaan yang keras terhadap ladang yang terletak di kawasan rizab jalan dan sungai.

"Beberapa petani dari Blue Valley sudah menerima arahan daripada Jabatan Tanah dan Galian Pahang untuk mengosongkan sebahagian ladang mereka yang terletak di rizab jalan dan sungai dalam tempoh dua minggu.

"Saya menjelaskan kepada Menter Besar bahawa petani Blue Valley sudah mengusahakan tanah mereka selama berpuluhan tahun untuk mencari rezeki.

"Selain itu, ramai petani kini menghadapi beban kewangan akibat gangguan rantaian bekalan makanan ketika pandemik dan peningkatan kos pertanian seperti harga baja serta sewa tanah pertanian," katanya.

Menurutnya, petani di Blue Valley juga rela mengosongkan sebahagian ladang mereka tanpa meminta sebarang pampasan daripada kerajaan berhubung pembinaan Jalan Persekutuan FT185 yang menghubungkan Tanah Tinggi Lojing dan Simpang Pulai.

"Oleh itu, saya menyeru kerajaan untuk mempertimbangkan dan bersimpati terhadap nasib petani untuk mencapai situasi menang-menang," katanya.

-Metro